



O'ZBEKISTON RESPUBLIKASI
OLIY VA ORTA MAXSUS
TA'LIM VAZIRLIGI



ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРЛИГИ
БУХОРО ДАВЛАТ УНИВЕРСИТЕТИ
ЖАҲОН ТАРИХИ КАФЕДРАСИ

ЖАҲОН ТАРИХИНинг ДОЛЗАРБ МУАММОЛАРИ

МАВЗУСИДАГИ РЕСПУБЛИКА МИҚЁСИДАГИ ОНЛАЙН
ИЛМИЙ-АМАЛИЙ АНЖУМАН

МАТЕРИАЛЛАРИ



БУХОРО-2020

Файзуллаева М.Х. Антропология оламида инсон ва таом	59
Орзиев М.З. Туркистон ва Бухорда Эрон матбуотининг тарқалиши (XX аср бошлари).....	63
Джураев Х. Х. Араб ёзувидаги нодир қўлёзма манбаларни моддий-техник маълумотларига қараб таҳлил этишининг долзарбилиги	68
To'rayeva G. B. O'rta osiyoning moddiy madaniyati va san'ati tarixini o'rgangan arxeologik ekspeditsiyalar	72
To'rayev A. I. Buxoro vohasiga ko'chib kelgan turkmanlarning oila-nikoh munosabatlari.....	75
Ахматов А. Ўзбек матбуотида иккинчи жаҳон урушининг ёритилиши	78
Маҳаммадиева С. Марказий осиёнинг ўрта асрларда аҳолиси ва этник таркибининг ўрганилиши.....	81
Tilavova Sh.S. Amir Shohmurod faoliyati davrida Buxoro amirligida ijtimoiy- iqtisodiy va siyosiy hayot.....	87
Раджабов О. XIX аср Британия тарихшунослигига “Катта ўйин” масаласи ва либерал тарихшунослик	92
Sharipov U.O. Qayumov T.T. Jahon tarixi fani mavzularini o'tishda innovatsiya (Ilmiy tadqiqot yangilik)larni joriy etishning amaliy ahamiyati	97
Хомиджонова М. Некоторые суждения о возникновении науки антропологии	101
2-ШЎЙБА ЖАҲОН ЦИВИЛИЗАЦИЯСИ ВА МАРКАЗИЙ ОСИЁ: ТАРИХ ВА ҲОЗИРГИ ЗАМОН	
Иноятов С. Жаҳоний шуҳрат соҳиби: шоир, матбуотчи, табиб ва жаҳонгашта сайёҳ	109
Jaimee K. Who are the shaybanids?	114
Рашидов О.Р. Маҳмуд Аз-Замахшарий илмий меросининг жаҳон тамаддунига қўшган ҳиссаси	121

МАҲМУД АЗ-ЗАМАХШАРИЙ ИЛМИЙ МЕРОСИННИНГ ЖАҲОН ТАМАДДУНИГА ҚЎШГАН ҲИССАСИ

Рашидов О.Р.

*Бухоро давлат университети доценти, тарих фанлари бўйича фалсафа
доктори*

Маҳмуд аз-Замахшарий 1075 йили Хоразмнинг Замахшар кишлоғида ўрта ҳол оиласида дунёга келган. Унинг тўлиқ исми Абул Қосим Маҳмуд ибн Умар ибн Аҳмад аз-Замахшарийдир. Замахшарийнинг отаси ўз даврининг саводли, анча тақводор, диёнатли кишиси бўлган, аксар вақтини Қуръони карим тиловати ва тоат-ибодат билан ўтказиб, Замахшардаги бир масжида имомлик қилган. Аллома асарларининг бирида ўз волидаси ҳақида қуидаги маълумотларни келтирган: “Ёшлигимда бир воқеа бўлган эди. Кунлардан бир кун бир чумчукни тутиб олиб, оёқларини ип билан маҳкам боғладим, бироқ чумчук қўлимдан чиқиб кетиб, девор орасига (инга) кириб бекинди. Мен уни индан тортиб чиқариб олдим. Оёғига боғланган ип сиққани натижасида қушнинг оёғи узилиб тушди. Бундан онам қаттиқ хафа бўлиб: “Сен қушнинг оёғини кесганинг каби худо ҳам сенинг оёғингни кессин”, деб мени қарғади”. Маълумки, аз-Замахшарийнинг бир оёғи йўқ бўлиб, у бутун умр ёғоч оёқда юрган. Шу хусусда тарихчилар унинг бир оёғи бўлмагани, ёғоч оёқда юргани ва узун якtagини тушириб кийгани учун қўрган одамлар уни чўлоқ деб ўйлашларини ёзадилар. Тарихчилардан баъзилари, алломанинг бир оёғи йўқлигини қаҳратон қишида совуқ олганлигидан деб ёзса, яна бошқаси болалигига отдан йиқилганини келтиради.

Маҳмуд аз-Замахшарий отаси қўлида совод чиқарганидан сўнг ислом оламида донғи кетган Бухоро ва Хурросон мадрасаларида ўқиган. Олим ҳаёти давомида қўплаб мусулмон мамлакатлари Эрон, Арабистон, Ироқ, Яман, Шом (Сурия)да саёҳат қилди. Шунингдек, бир қатор шаҳарлар Марв, Нишопур, Исфаҳон, Боғдод, Ҳижоз, Дамашқ ва Маккада яшаб, асалари учун бой манба тўплаган. Жаҳон илм-фани ривожига қўшган ҳиссаси эҳтироми сифатида Аз-Замахшарийга “Жоруллоҳ” яъни “Аллоҳнинг қўшниси”, “Устоз ул-

ЖАҲОН ТАРИХИНИНГ ДОЛЗАРБ МУАММОЛАРИ

араб ва-л-ажам" ("Араблар ва гайри араблар устози") ва "Фаҳру Ҳваразм" ("Хоразм фахри") деган фахрли номлар берилган.

Буюк мутафаккир аз-Замахшарий бизга бой ва улкан илмий мерос қолдирган. У тилишунослик, лугатшунослик, адабиёт, аruz, жуғрофия, тафсир, ҳадис, фикҳ ва илм ал қироатга оид эллиқдан ортиқ асарлар яратган бўлиб, уларнинг аксарияти бизгача етиб келган. Замахшарий араб тили ва адабиётига чукур ҳурмат билан қараган ва ўз асарларини фақат араб тилида ёзган. Олимнинг асарларини мазмунига қараб, асосан қуйидаги гурухларга бўлиш мумкин:

- а) диний илмлар ва уламолар ҳақида;
- б) лугатшунослик;
- в) грамматика (наҳв);
- г) аruz;
- д) адабиёт;
- е) мантиқ.

Маҳмуд аз-Замахшарий Макка шаҳрида яшаган пайтида – 1119-1121 йилларда араб тили грамматикасига бағишиланган "Ал-Муфассал" асарини ёзди. Бу асар араб тили грамматикасини ўрганишда азалдан Шарқда ҳам Фарбда ҳам донғи кетган асарлардан ҳисобланади. "Ал-Муфассал" нинг бир қўлёзмаси Тошкентда, Абу Райҳон Беруний номли Шарқшунослик қўлёзмалар фондида (5198-рақамда) сақланади. "Ал-Муфассал фи санъат ил-иъраб" номи билан аталмиш ушбу китобим тўрт қисмдан иборат", деб таъкидлайди аз-Замахшарий китобига ёзган муқаддимада. Биринчи қисм – исмлар, иккинчи қисм – феъллар, учинчи қисм – кўмакчилар, тўртинчи қисм ушбу ҳоллар муштарак бўлганлардан иборатdir".

Маҳмуд аз-Замахшарий илмий меросини ўрганган хорижлик тадқиқотчилардан бири Н.И.Робакидзе ҳисобланади. Унинг тадқиқот мавзуси "Аз-Замаҳшарийнинг фонетик концепцияси (XII)" деб номланган. Мазкур тадқиқотда Маҳмуд аз-Замахшарийнинг ҳаёти ва ижоди ҳамда "Ал-Муфассал" асари асосида араб тили фонетикаси асосларини тадқиқ этганилиги таъкидланган. Шунингдек, грузиялик тадқиқотчи Г.С.Ахвledиани ўзининг "Умумий фонетика асослари" китобида Маҳмуд аз-Замахшарий илмий меъросининг жаҳон илм-фанига қўшган улкан хиссасини келтириб ўтади.

Аз-Замаҳшарий Макка шаҳрида яшаган пайтларида яратилган асарларидан яна бири “Навобиғ ул-калим” (“Нозик иборалар”) ҳисобланади. Мазкур асар қўлёзмаларидан бир нусхаси Боғдодда Ироқ Миллий музейида (563-рақамда), ундан ташқари Берлинда (8676), Лейденда (891 ва 92-рақамларда) ҳам сакланади. “Нозир иборалар” асарига бир қанча шарҳлар ҳам битилган бўлиб, улардан Самарқандда, Амир Темур саройида хизматда бўлган йирик аллома Саъдуддин ат-Тафтазонийнинг “Ан-Ниъам ас-савобиғ фи шарҳ ин-навобиғ” (“Ан-навобиғ”нинг шарҳида улкан неъматлар”) эътиборга молиқдир. Мустақиллик йилларида алломанинг ушбу “Нозир иборалар” асари шарқшунос олим Убайдулла Уватов томонидан ўзбек тилига ўгирилиб нашр этилди.

Алломанинг ҳали тўлалигича ўрганилмаган асарларидан бири “Робийъ ул-аброр ва нусус-ул ахёр” (“Яхшилар баҳори ва хабарлар изҳори”) ҳисобланади. Бу асар ҳозирги шароитда ўрганилиши долзарб бўлган асарлардан саналади. Чунки асарда шиддат билан ўзгариб бораётган жамиятимиздаги барча соҳаларни қамраб олган ижтимоий, сиёсий, маънавий ва ахлоқий қарашлар баён қилинган.

Асар таркибий жиҳатдан бешта қисмдан иборат. Биринчи қисм дастлабки ўн беш бобни ўз ичига олади. Иккинчи қисм эса ўн олтинчи бобдан ўттиз иикинчи бобгача, учинчи қисм ўттиз учинчи бобдан эллик саккизинчи бобгача, тўртинчи қисм эллик тўққизинчи бобдан етмиш бешинчи бобгача ва сўнти бешинчи қисм етмиш олтинчи бобдан тўқсон саккизинчи бобгача бўлган бобларни ўз ичига олади. Асарда берилган ҳар бир боб алломанинг ўз замонасининг долзарб бўлган масалаларига бағишлиданади. Жумладан, дунёнинг яратилиши, табиат ҳодисалари, борлиқдаги мавжуд нарсалар, давлат бошқаруви, сиёsat, одоб-ахлоқ, таълим-тарбия, охират каби хабарлар, ҳикоялар, ибратли хикматлар ўрин олган.

Маҳмуд аз-Замаҳшарий ўзининг илмий фаолияти барқ урган даврда “Атвоқ уз-заҳаб фи-л-ма-воиз ва-л-хутаб” (“Ваъз ва хутбаларда олтин шодалар”) асарини яратган. Ушбу асарнинг дастлабки номи “Ан-Насоих ас-сиғар” (“Кичик насиҳатлар”) деб аталиб, юз мақоладан иборат ибратомуз ҳикматлар, фойдали насиҳат ва гўзал ахлоқий ўйтлардан иборатдир. “Олтин шодалар” асарига шарҳ ёзган Мирза Юсуфхон ал-Аштиёний шундай ҳикоя қиласи: “Аз-Замаҳшарийнинг

ЖАҲОН ТАРИХИНИНГ ДОЛЗАРБ МУАММОЛАРИ

бу асарини Маккани (байтуллоҳни) тавоғ қилган вақтида ёзган. Чунончи байтуллоҳни тавоғ қилиб ҳар бир айланганидан кейин бир мақола ёзган. Мақолани ёзиб, яна айланган ва шу тариқа юз марта тавоғ қилганидан сўнг юз мақола ёзилган". Аз-Замахшарий ушбу китобда келтирилган мақолаларида золим ҳукумдорларни ҳам, фалсафа ва илм ул-фалак тарафдорларини ҳам кескин танқид қиласди. Порахӯр қозиларни, адиллар, илм аҳллари ўртасида бўлган ашаддий кўчирмачиликни, мол-дунёга хирс қўйган уламоларни койиб, ижтимоий иллатлар ҳақида очиқ-ойдин ёзади.

Олимнинг яна бир муҳим асарларидан бири "Асос ул-балоға" ("Балоғат асослари") саналади. Ушбу асарнинг нодир нусхаси Ўзбекистон Фанлар академияси Шарқшунослик институтида (5234-рақамда) сақланади. Аз-Замахшарий ўз асарларининг манбалари ҳақида гапириб, арабларнинг фасоҳатли лугатидан, турли-туман насрий ва назмий ёзма манбалардан тўплаган ажойиб ибораларга, шунингдек, бозорларга, масжиду жомеълардаги сўзга чечан хатиблардан эшитганларига асосланиб ёзгани ҳақида зикр қиласди. Шу билан бир қаторда "Асос ул-балоға" нинг асосий манбаларини қуидагилардан иборат дейиш мумкин:

- 1) Қуръони карим;
- 2) пайғамбар ҳадислари;
- 3) Умар, Али каби халифалар, саҳобалар ва бошқа фасоҳатли нотиқларнинг калимаю сўzlари;
- 4) Жоҳилия, исломдан аввалги ва ислом шоирларининг шеърлари;
- 5) Масаллар;
- 6) араблар насрий асарларида қўлланилган иборалар.

Махмуд аз-Замахшарий ижодининг гултожи бўлган ва илм-фан оламида ғоятда кенг танилган "Ал-Кашшоф" асари Қуръони каримга ёзилган машҳур тафсирдир. Асарнинг тўлиқ номи "Ал-Кашшоф ан ҳақоқиқ ит-танзийл ва уйун ил-ақавийл фи вужух ит-таъвийл" ("Қуръондаги берк ҳақиқатларни ва уни шарҳлаш орқали ривоятлар кўзларини очгич") бўлиб, ғоят қимматли саналади. Аллома ўзидан олдин яратилган Қуръон тафсирига бағишлиланган кўплаб асарларни кунт билан ўрганиб, ўз асарида улардан унумли ва танқидий равища фойдаланган. Натижада мукаммал бир тафсир, яъни "Ал-Кашшоф"

вужудга келган. "Ал-Кашшоф" асари ҳар хил даврларда Қуръонга ёзилган тафсиrlар ичида етакчи ўринлардан бирини эгаллайди. Бу асар ҳозирги вақтгача араб мамлакатларида кўплаб мусулмон аҳли, айниқса олимлар учун энг зарурий китоблардан бири ҳисобланади. Қоҳирадаги бутун дунёга машҳур "Ал-Азҳар" диний дорилфунунининг талабалари эса аз-Замахшарийнинг "Ал-Кашшоф" асари асосида Қуръонни ва унинг тафсирини ўрганиб, ундан муҳим бир дастур сифатида фойдаланадилар.

Юқорида айтилган фикрлардан яққол кўриниб турибдики, хоразмлик буюк аллома аз-Замахшарий кейинги авлодларга бекиёс бой маданий мерос қолдирган. Ўзининг бутун умрини ва жўшқин фаолиятини илм-фан йўлига баҳшида этган, фаннинг турли соҳаларига оид кўплаб асарлар яратган. Аз-Замахшарийнинг чуқур билими, буюк даҳоси ва фаннинг турли соҳаларига оид ўлмас асарлари ҳали у ҳаёт пайтидаёқ бутун мусулмон Шарқида унга бетакрор шухрат келтирган.

АДАБИЁТЛАР:

1. Уватов У. Абу-л Қосим Маҳмуд ибн Умар ибн Аҳмад аз-Замаҳшарий. Нозик иборалар. – Тошкент: "Камалак", 1992.-Б.5.
2. Маънавият юлдузлари (Марказий осиёлик машҳур алломалар, адилар). Тўпловчи ва масъул муҳаррир М.Хайруллаев. – Тошкент: "Абдулла Қодирий номидаги ҳалқ мероси", 2001.-Б. 137.
3. Уватов У. Абу-л Қосим Маҳмуд ибн Умар ибн Аҳмад аз-Замаҳшарий. Нозик иборалар. – Тошкент: "Камалак", 1992.-Б.26.
4. Фонетическая концепция Аз-Замахшари (XII) -
<https://www.dissercat.com>.
5. Тўраев Л. Маҳмуд Замахшарийнинг "Робийъ ул-аброр" асари қўлёзмаси ва унинг Тошкент нусхалари // Sharq mash'ali журнали 2019 йил №3.-Б.82.
6. Уватов У. Абу-л Қосим Маҳмуд ибн Умар ибн Аҳмад аз-Замаҳшарий. Нозик иборалар. – Тошкент: "Камалак", 1992. –Б.28.
7. Ислам.Энциклопедический словарь. Под редакцией С.М.Прозорова. Том I. – Москва: Восточная литература,2006. –С.150.